

# Pierre Vercoulen vertelt.....



## Wae hebbe we dao dan .....

Unne interviewer stelt normaal waat vraoge en dan kômme de verhaole vanzelf.

Det is anders beej Pierre Vercoulen want as dae op de praotstool zit of unne microfoon in de hand haet, kumpse d'r nimmer tösse. De stels vraoge maar hae haet gewoën al zien eige verhaol gemak.

Daags veur ziene verjäärdaag heb ik mien "achterlik" (met goedkeuring) naefke thoès opgezôch en haet hae zien laevesverhaol verteld.

## Pierre verteld:

Ik bin gebaore in ut Ven op de Schoëlstraot en in 1939 zien we naor den Boerendanswaeg verhoès.

Det loog vlak beej ut St. Jozefziekehoès en maar good auk, want dao stônd ik al vanaaf mien geboorte

ônder behandeling van unne kinderarts vanwaege un aangebore hertaafwièking.

In 1943 meus de ganse femielie evacuere.

Mien elders zien toen met 5 kinder naor mien Opa en Oma vertrokke op de Straolsewaeg.

Dao hebbe we gewoeënd tot ut ind van den oorlog.

Kaolzwarte militaire reeje met eur tanks en jeeps veurbeej beej Opa en Oma en weej kregre gratis sjoklaad en kauwgum van die jônges.

Náo den oorlog truuk naor de Boerendanswaeg wao genôg militair materiaal loog um mei te speule.

Weej woënde in un kinderrièke buurt, unne geweldige tièd.

Op de liégere schoël woort mich al door pap en mam gezag det ik good mien bes meus doon.

Door mien hertaafwièkeing kôs ik genne profvoetballer waere of andere zwaore arbeid doon, dus meus ik met mien köpke de kos verdeene.

Met gooje punte kôs ik naor ut Thomascollege.

Oké, ut Thomascollege loog vlakbeej det waar gemekkelik, maar de broeders en paters

Augustijne ware absoluut neet mien vrinde.

Weej hadde 10 kinder thoès en umdet mien elders weinig schoèlgeld kôte betale waar ik eine outcast.

Ik kreeg straf, straf en nog ens straf, waat un klojo's ware die Augustijne en det is hiël netjes oetgedrök!

Ze hebbe mich mien puberteitsjaore verknald, ik kin d'r nog kwaod euver waere.

Eine van die priëmers waar dirigent van ut knapekoèr van ut Thomascollege.

Umdet ik waar gezaegend met un heldere soprane-stum, die met de 14/15 verdwene is, moch ik de solo zinge van ut Avé Verum van Mozart.

Ut einige positieve waat ik mich herinner oèt die periode.

Toen ik de baard in de kael kreeg waar ik veur den dirigent nimmer interessant.

Ik heb weinig leuke herinneringe aan die ganse Thomascollege-periode.

Met mien HBS-diploma bin ik werktuigbouwkunde gaon studere op de H.T.S., gevestig in de vruugere Môsterdschoël in Venlo en det leep prima.

In 1960 kreeg ik un baan beej de Emwée, later euvergenaome door Océ.  
Dao heb ik mien bes gedaon tot 1999 en kòs toen met vervruug pensioen.

In den tössentied had ik ut verschil ôntdek tösse jônges en maedjes.  
Met de 18 jaor heb ik Tiny lière kinne op unne vastelaovesbal in "De Prins".  
Samewoëne waar d'r in daen tied neet beej en we zien in 1963 getrouwd.  
We kwame te woëne in de niejbouwwièk Vastenaovendkamp.

Un jônge wïek met vuël  
bewoëners die nog neet vuël te  
bestaeje hadde.  
De oplossing waar gauw gevônde,  
zoèvuël meugelik same doon.  
De tuin inrichte, paedjes legge, un  
schöpke bouwe en op den tièd un  
pilske drinke of un feesje bouwe.

Toen kwaam 1964, veur Tiny en  
mich un kritiek jaor, ik meus un  
aope hertoperatie ôndergaon.  
Ut waar un hiël linke zaak en in  
die 3 maond det ik in Utrecht in ut  
ziekehoès gelaege heb zien vuël  
minse van mien aafdeiling neet  
mièr truuk gekômme.  
Waat heb ik mazzel gehad en nog  
trouwes.

Ik waar unne smale derm toen ik  
ut ziekehoès in ging maar toen ik  
weer thoès kwaam  
waar Jaerke un breinaold van nog  
maar 43 kg.

Tièdes mien herstelperiode kreg  
we vuël bezoek, veural van de  
femiëlie en oèt de buurt.

De Smeetsen , Jan en Pierre, toen  
auk oèt de vastenaovendkamp, hebbe ôs gevraog um te kômme badmintonne in de  
Laurentiuszaal.

Veur mich begós toen eigelik pas de sportperiode.

Door die operatie kós ik lichamelik vuël mièr doon en kreeg un steeds baetere kônditie.  
Waat hebbe we met die hechte club vuël plezeerige en leuke activiteite meigemak, unne  
geweldige tièd.

In diezelfde periode ind 1966 woord ôzze Paul gebaore en in 1968 kwaam dochter Emmy.  
Umdet Rapido gen jeugleeje had, hebbe zeej jaorelangk beej BC United gespeuld..  
Inmiddels hebbe ze neet stil gezaete en zien we de trotse opa en oma gewaore  
van 5 kleinkinder.

(interviewer: Intelik bin ik aan de beurt !!)

**Dich bis jaore veurzitter gewaes van Rapido, wat wáar en is Rapido veur**



**dich.**

Midde 1970 vroeg de toenmalige veurzitter Jan Smeets mich um de veurzittershamer euver te neme.

Ik heb jao gezag en dao noëts spiét van gehad.

Umringk door nog 6 andere bekwame bestuursleeje en met behölp van de leeje ware weej in staot um van alles te organisere en te laote slage.

Weej ware in de regio Venlo de club die neet gefuseerd zien met BC United.

We bleve de kleine badmintonclub met hiël vuël gezellige naeve activiteite.

Ik heb in al die jaore gelièrd desse môs observeere.

Wie gek ut auk klink maar asse good observeers húerse auk vuël.

Met die kinnes bleef ik mich, same met de andere bestuursleeje, bezig halde met de toekôms van de club.

Met kiëke, luustere en wakker bliëve bisse un club al stevig aan ut besture.

BC Rapido..... zôn club die môsse preuve.

De môs waal taegge un geintje kinne en gewoën meidoon as d'r weer waat unieks bedach wuurd.

Un club die al 50 jaor besteit en waovan de vruègere en huidige leeje leuke herinneringe hebbe en waose vrinde aan euver hils.

**Waat waar in dien veurzittersperiode veur dich de opmerkelijkste gebeurtenis.**

Ièrluk is ièrluk, ik had beej mien aaftraeje as veurzitter un Venlose waarderingsmedaille verwach, net wie weej det toendertièd georganiseerd hadde veur Pierre Smeets

veur ziene inzet beej IL 56, BC Rapido en ut Zangkoèr. Maar ut is anders gelaupe.



In 2004 organiseerde BC Rapido un stadswandeling in Venlo, gestart woort beej ut museum van Bommel van Dam.

Tiny en ik schreve ôs in en ik stônd op dae bewuste daag klaor in mien ribbôks, ôngepoetste wandelschoon, aoep haemp en zônnebril.

Niks d'r van zag Tiny, det duis dich neet aan.

Ik gaon neet met zônne "sjappie" un stadswandeling make, trek dich maar weer um.

Nôndeju, alweer umtrekke, dao heb ik zônne haekel aan.

Nao vuël moppere stônd ik un kwarteer later in mien good pak met beejpassend haemp, slieps en schoon klaor um te gaon.

Oké zei Tiny, det zuut d'r baeter oèt veur un stadswandeling.

We kwame netuurlik vuël te laat beej ut museum aan en woorte begroet met de wäörd: Hé, hé, intelik is groep 8 auk kómpleet.

Hang de jas heej maar op en laup maar door naor de zaal.

Ut veel mich op det d'r vuël bekinde ware die neet beej Rapido hoorte, maar ja ut is un museum.....

De Börgemeister waar zelfs dao, dae löp toch neet mei met un stadswandeling van Rapido!

Hae pakde de microfoon en vroeg Tiny en mich um efkes naor veure te kômme.  
En jao huër, Rapido had ut geflik en tot mien stômme verbazing kreeg ik zelfs un keuninklike ônderscheiding.

Ut waar un kómplete verrassing, wao ik erg bliej en auk trots op waar.

Maar good det ik mien zôndaags pak aan meus trekke van Tiny anders had ik moei veur Jan L..... gestaon..

De stadswandeling veel erg kort oét en leep van ut museum naor de kroeg, wao we nog ein prachtig fees hebbe gehad.

### **Hebse nog mièr hobby's boète badmintonne.**

Jao en ut velt mich noow op det ut allemaol met bel te make haet.

Ut begós met taofeltennise beej de speeltuin van Genüe.

Beej ut tennisse houw ik taegge unne gruttere bal en beej ut golve gebroek ik un kleiner määötje.

Ut môt waal in ut gaetje passe netuurlik.

Veur de variatie doon ik tössedoor badmintonne met unne shuttle.

As voetbalfan kièk ik gaer naor VVV en dao speelt den bal auk un hoofrol.

Zoëlang miene aom en de wekker ut toelaote blièf ik actief met sporte.

### **Wao bisse ut meiste trots op.**

Ik bin biezônder trots op mien femielie.

De begins met z'n twië en de môs noow ens kièke waat un stel.

Ik geneet ut meiste van ôs kinder en kleinkinder as weej op jaorlikse skivakantie gaon.

Veural as de kleinste blaag zoë enthousiast taegge mich duit en zien smile-tuutje luèt zien, dan bin ik nöriges mièr.

Weej doon det al 39 jaor, iérs met ôs kinder en noow met de ganse bubs naor dezelfde streek in Zuid-Tirol.



### **Wao geisse ut leefste op vakantie en waarom.**

Veur mich is neet zoë belangrièk wáo maar met wae ik op vakantie gaon.

Wie ik al verteld heb vind ik ut prachtig um met de ganse bubs op wintersport te gaon.

Tössedoor zien we auk waal ens, met un jubileumjaor , naor un " all inclusive hotel "gegaon op Majorca of in Turkije.

De grandioze wandelvakanties met 'n steeds kleiner groepke van Rapido in the middle of nowhere zien zeker hoëgtepunte.

De hoofs eigelik gaar gen tale te kinne want ik praot in ut boèteland altièd Venloos, ongeluiflik maar det versteit idderein.

Oké, met behölp van un bietje hand en veutwerk lök ut nog baeter.

### **Met wae zoelse unne kièr un beschuutje wille aete .**

Met de aldste vrouw van Venlo en ik dink det det ôs vruugere buurvrouw van de Boerendanswaeg is.

Of ze mich nog kint en wit waat un beschuutje is, betwiéfel ik.

Ze woënt noow in de Meeuwbeemd en duit de letste jaore allein maar zinge en lache.



Det waar vruuger waal anders, toen waar ut un vervaelende tante en de grutste greek dae in Venlo rôndleep.

Eure man waar unne erme Hary dae in den hemel zeker unne gemakkelikke praos verdeend haet.

Minse kinne dus auk in eur véurdeil verandere as ut geheuge naoluët.



### Hebs dich un typisch Vercoulen's motto, boète ut gaeve van beejnaame.

Ik bin ein koéleköpke en ôs motto is:

**Probleme zien d'r um opgelos te waere.**

**Kinse ut neet zelf, laot dich helpe.**

Trouwens, miene beejnaam is Jip en dae heb ik aan Bart Vercoulen te danke.

As kleine bôksebaom kôs dae miene naam neet oëtspraeke en neumde mich altièd Jip.

Ziene pap, mien broor, hit Jan en ut logische gevolg is dan netuurlik det se ôs Jip en Janneke ginge neume.

Det woort mich nog ens duudelik gemak met miene 60e verjäärdaag. (foto)

### Waat haet in dien laeve de meeste impact gehad.

Ut klink hiël gek en is neet zôn fris verhaol.

Toen ik in 1964 in Utrecht in ut ziekehoès loog had ik un fles aan ut bed hange wao mien eige wiewater in leep.

Ut waar belangrièk det de niere bleeve werke nao de hertoperatie anders ging ut de verkièrde kant op.

In de waeke veur mien operatie ware vuël patiënte nimmer truuk gekômme op de aafdeiling. Ze hadde ut neet euverlaef umdet de niere oëtgevalle ware.

De kans um in 1964 un aope hertoperatie te euverlaeve waar zoëwiezoë klein.

Maar mien grutste zörg op det moment waar: good functionerende niere.

Mien ièrste vraog aan Tiny nao de operatie waar: kump d'r auk urine in de fles aan ut bed?

Asse dan un bevestigend antwoord kries is det un gelökzalig gevoel, ônbeschriefflik.

Ut guf dich mood en de bis elke dokter en verpleegster dankbaar dae daonao aan dien bed kump.

### Waoreuver wilse nog waat kwièt.

Ut 50 jäärig bestaon van Rapido is aafgelaupe jaor oëtbundig gevierd.

Alle deilnemers ware oëtgespraoke ônder den indrök van de organisatie.

As ut aan ut bestuur leet gaon we de volgende 25 jaor met groët vertrouwe tegemoot.

De saamhuurigheid en de gezelligheid zulle de peilers bliëve van de club,

maar det kin allein as we **neet** geluive in de oëtspraak: "de kins leeje niks verplichte"!

De mós de leeje enthousiast make mei te doon op de trainingsaovende en ze beej de diverse aktiviteite betrekke.



Staek waat tièd in ut benadere van de minse die nöriges aan mei doen.  
Zeuk de raeje van de desinteresse veur un activiteit en probeer ze mei te trekke.

**Waorum wilse zoè gaer det de köskepel; "Zie ginds komt de stoomboot" speult.**

**Glufse nog in Sinterklaos?**

De joekskepel van Rapido guf al jaorelangk aan alle activiteite en feeste extra gezelligheid met eur muzièk.

Ik kin gen inkel ander leedje wao idderein zoè enthousias met zingk en dao auk de teks van kint.

Ik gluif zeker in Sinterklaos want ik dink det dae d'r veur gezörg haet det ik d'r nog bin.

Sinterklaos haet zelf ut ieuwige laeve, elk jaor in december kumpe truuk, de beste patroën um dich aan vas te halde vind ik.

**Wao dinkse aan beej de venlose oètdrökkinge:**

**- Ein óns gelök is mièr as eine kilo verstand en**

**- Alles kin behalve unne nekse in de tes schiète.**

As ik die 2 oètdrökkinge efkes meug koppele zoel ik zegge:

Asse verstand hebs witse desse unne nekse neet in de tes kins schiète,  
maar asse gen gelök hebs schietse d'r altièd naeve.

Elly van Elswijk-Vercoulen